

■ SOCIETÀT FILOLOGJICHE

I articui di Verone su art e glesie in Friûl

Al è stât presentât sot Nadâl tal centri "Paulin di Aquilee" a Udin il libri "Art e glesie in Friûl" publicât de Societât Filologjiche Furlane cul jutori de Bancje Popolâr di Cividât. Il volum, che al cjape dentri plui di cent articui scrits di Luzian Verone tra il 2000 e il 2002 pe rubriche "Art gleseastiche in Friûl" de "La Vita Cattolica", al è stât presentât di bande di bonsignôr Duili Corgnali, che in chei agns al jere diretôr dal setemanâl diocesano.

Cun plui di cent articui in lenghe furlane, l'autôr nus regale un viaç dilunc dai tesaur dal nestri Friûl, di ca e di là da l'aghe, des plêfs su lis monts de Cjargne fin aes glesiis de marine. In ogni articulo e je la descrizion di une glesie, des bielecis di un puest o ben di cualchi opare artistiche di valôr particular. La publicazion, che e viôt la lûs pal inovâl de muart di Verone, e je il just ricognossiment che la Filologjiche e à volût fâ a un dai siei mestris "storics" dai cors pratics di furlan, che nus à lassât za dîs agns, ai 10 di Dicembar 2002.

SCOLTADIS DI DRIUS

Armârs plens

Le me femine e à doi armârs plens di: "No ài nuje ce mèti".



La simpatie dai Gnognosaurs

La Patrie dal Friûl e à editât, cul sostegn de Agenzie regionâl pe lenghe furlane, l'ultin libri di Dree Venier, une racuelte che e propon trê des miôr contis publicadis fin cumò. » DI CHRISTIAN ROMANINI

Par lôr il 2014 nol passarà sot vie considerant che a son stâts i protagoniscj par dut l'Istât e pal Autun. Martin, Momo, Ciccì, Bombo, Rugne... a son nons che a rivî di lontan, ma che a son jentrâts cun ducj i lôr amîs in tantis cjasis furlanis e no dome.

A son i Gnognosaurs, i simpatics dinosauruts, un pôc 'gnognos' apont, che a fevelin par furlan, nassûts dal lapis di **Andrea Dree Venier**.

Il lôr ultin libri editât da La Patrie dal Friûl cul sostegn finanziari de Agenzie regionâl pe lenghe furlane, dopo jessi stât distribuît in dutis lis ediculis des trê provinciis dal Friûl al è cumò in mò disponibil contatant l'editôr. "The Best(iis)" al è il titul de racuelte che

e propon trê des miôr contis publicadis fin cumò: 'Lis origins', 'A vore' e 'Lis vacancis', gjavadis fûr dal prin (2009), dal tierç (2011) e dal secont (2010) volum.

La novitât de publicazion, oltri che a une complete e curade revision dai tescj fate di **Linda Pic-**

co, e je 'la vuide minime' aes regulis de marilenghe che e vierç il libri: 'No stâ a fâ il gnogno, impare a lei!' dulà che in maniere une vore sintetiche, ma efficace, l'autôr al propon lis regulis de grafie uficiâl publicadis dal Osservatori pe lenghe furlane tal 2002.



La cuvertina

E come 'zucar su lis freulis' e je rivade anje la prefazion di **Manuele Fior**, l'illustradôr furlan pluripremiât che tal 2001 al à vinçût il premi 'Fauve d'Or' al Festival di Angoulême in France, vâl a dî 'l'Oscar dai fumuts'.

PAGJINIS CJAMADIS DI COLÛR

Cun chestis 84 pagjinis cjamadis di colôrs e simpatie, La Patrie dal Friûl e torne a meti in vore la produzion editoriâl come che al conferme anje

pre **Roman Michelot**, president dal sodalizi editôr de storiche riviste mensil dute par furlan: "Ancje se al è timp di clârs di lune, si stin impegnant par publicâ almancul un libri par an, cui Gnognosaurs o vin sielt di scomençâ de fonde, ven a stâi cuntun libri che, no dome al è divertent e di grande cualitât, ma al insegne anje a lei. Di fat, il fumut al è une vore adat par imparâ la lenghe. Par chest i ten a ringraziâ Venier pal impegn che al à metût. Cu la prossime publicazion, o vin voie di cjalâ ae storie dal Friûl, une altre materie che la scuele e trascore di insegnâ cuntun voli Furlan".

Cui che al fos interessât a cjoli une copie di 'The Best(iis)' al pues contatâ La Patrie dal Friûl scrivint a info@lapatriedalfriul.org o tignit di voli la pagine Facebook o il profil Twitter de Patrie o dai Gnognosaurs par cognossi lis datis dai events sul teritori.



ilfriuli@ilfriuli.it

Euronews informa

Presentât a Palaç Belgrât il libri di Diego Cinello "Friûl a svol di sisile"

Eje stade presentade in chescj dîs tal salon dal Consei di palaç Belgrât, sede de Provincie di Udin, la ultime opare di Diego Cinello: "Friûl a svol di sisile". E je une "conte", midiant imagjins, de nestre region e dal Friûl in particular. Daspò dal salut dal president dal Ent di aree vaste, prof. Pietro Fontanini, e l'intervent dal prof. Mauro Pascolini, diretôr dal Dipartiment di sciencis umanis de Universitât di Udin, e à illustrât la opare la prof.re Cristiana Compagno, presidente de Bancje Mediocredito FVG.

La Compagno, che e à anje curât la introduzion dal libri, e à metût in lûs cemût che Cinello, cun chest lavôr, al à decidût di con-



tâ il Friûl midiant un centenâr di imagjins che a 'nt mostrin e a favorissin cetantis parts impuartantis. "La sò storie no je en-

ciclopediche, il so pont di viste nol è banâl ni scontât. Il Friûl che al ven fûr al è un Friûl fat di tiere, di lidris profundis peadis ai

cjamps, ai prâts, ai boscs, a lis malghis, a lis cjasis, a chei lûcs che a son cjasis, paîs, che a son puescj".

E je une conte che Diego Cinello al à proponût sielzint (come che al ricuarde il titul) un pont di viste particular:chel midiant i voi di un uciel che al svole in alt tal cîl dal Friûl, "lassantnus a voltis maraveâts di tropis storiis che il nestri teritori al pues e al à di contâ, no dome come in cheste ocasion di bieî paisažs fats de nature e dal om, ma anje dal Friûl de modernitât, de sò gnove muse, de sò gnove int".

La particularitât dal libri di Cinello e ven anje dal fat che cetantis imagjins a vegnin fûr di plui scats, metûts adun a mosaic. Lis tantis fotos dal alt a son stadis realizadis in manieris diferentis, no dome dai ponts plui alt cognossûts (lis monts), ma anje dal elicotar doprant drons e lant sù sui cjampianii plui bieî.